

Mokoīguea Corinto pygua kuery pe Paulo ombopara va'ekue

Mokoīguea Corinto pygua kuery pe Paulo ombopara va'ekue

Kova'e kuaxia ma Corinto tetā pygua kuery pe apóstolo Paulo ombopara hexe opu'ā rei va'e ikuai omombe'ua rā oendu vy. Ha'e va'e kuery ma ojeupe "Apóstolo" he'i teī ha'eve'ÿa rami nhombo'e, apóstolo Paulo re ijayvu rei, ha'e opa marā rei ikuai aguā rami ojapo guive. Ha'e nunga apóstolo Paulo oendu vy gueko omombe'u porāve ha'e kuery oikuaa porāmba aguā rami. "Mba'eta ore ma Nhanderuete ayvu romombe'ua rupi ndorojokorei. Ha'e rami 'rāgue py Cristo re vy Nhanderuete guigua anhetēa rupi oreayvu roikovy, Nhanderuete renonde rupi ae" (2.17). Amongue henda py Paulo ndovy'ai vy ijayvu poyi ha'e kuery pe.

Paulo gueko re ijayvu vy ima'endu'a haxy va'e oendu oikovy va'e re. "Ha'e nunga rupi mboapykue Senhor pe ajerure xegui oipe'a aguā re. Ha'e rami teī ha'e aipoe'i xevy: 'Xee romboaxya ha'eve ma ndevy, mba'eta ikangy va'e re xepo'akaa ojekuaa porāve 'rā', he'i va'ekue. Ha'e nunga rupi avy'a reve 'rā xeayvu xekangya re, xere Cristo po'akaa oĩ aguā", he'i (12.8-9). Ha'e nunga ma ha'eve nhande kuery pavē pe.

Opaa py Paulo ijayvu ha'e kuery mba'emo ome'ẽ aguã Jerusalém tetã py Jesus remimbo'e kuery ikuai va'e pe, karuai oiko va'e gui ojexavai okuapy rã.

Oxarura reve ijayvu vy omboypyague

¹ Xee Paulo ma Cristo Jesus pegua apóstolo-rã Nhanderuete oipotaa rami xemoõ va'ekue. Irmão Timóteo reve roxarura Nhanderuete pegua igreja kuery Corinto py pendekuai va'e pe, ha'e iky'a e'ŷ va'e kuery Acaia yvy re pendekuai va'e ha'e javi pe guive.

² Tove peẽ kuery tapendu penemboaxyha'e mby'a porã Nhanderuete ha'e Senhor Jesus Cristo guigua.

Nhanderuete ombopy'a guaxua re Paulo oguerovy'aague

³ Ta'ima'endu'a porãa Nhanderuete nhande-Senor Jesus Cristo Ru va'e re. Mba'eta Nhanderu ma nhanemboaxy ha'e opa mba'e py nhanembopy'a guaxu va'e.

⁴ Ha'e rami vy ore voi opa mba'e py rojexavai rã orembopy'a guaxu 'rã, ore ju rombopy'a guaxu aguã opa mba'e gui ojexavai va'e, Nhanderuete orembopy'a guaxua py ae.

⁵ Mba'eta Cristo káuxa opa mba'e py rojexavaia rami avi Cristo orembopy'a guaxua voi roendu avi opa mba'e py.

⁶ Ha'e nunga rupi rojexavaia oiko va'e ma peẽ kuery pendepy'a guaxu ha'e peo jepe aguã oiko. Orembopy'a guaxua voi pendepy'a guaxu aguã oĩ,

mba'eta peẽ voi pendekuerai e'ŷ re peropo'aka pekuapy ore roiko axya ramigua.

⁷ Peẽ kuery re rojerovia, mba'eta roikuua ore rami pendekuai axya rami orereve avi 'rã penembopy'a guaxua.

⁸ Mba'eta irmão kuery, aipota peikuaa Ásia yvy re roiko jave rojexavaiague. Mba'eta ha'e nunga ndorogueropo'aka kuaavei peve ipoyi ramo noroexa'âvei ma va'ekue roikove aguã re.*

⁹ Ha'e rami vy orepy'a re romano taa roendu karamboae orejee ae rojerovia e'ŷ aguã, ha'e rã Nhanderuete omano va'ekue omboete jevy va'e re anho.

¹⁰ Mba'eta ha'e ae orereraa jepe karamboae ha'e rami ete romano aguã va'ekue gui. Hexe vy roarõ orereraa jepe riaeve aguã,

¹¹ peẽ kuery voi orepytyvõ ramo pejerurea py. Ha'e rami rã heta 'rã Nhanderuete oguerovy'a orere, heta ojerurea rupi orereraa jepe rire.

Paulo anhetẽa rupi oikoa re ijayvuague

¹² Mba'eta pova'e nunga re ae roguerovy'a: Pe-teĩve henda py orepy'a ky'aa noroendui, mba'eta Nhanderuete guigua iky'a e'ŷa ha'e anhetẽa rupi orekuai kova'e yvy re, peẽ kuerya py guive. Avakue 'arandua rupi e'ŷ roiko, ha'e rã Nhan-deruete oremboaxya rupi.

¹³ Mba'eta pendevy romboparaague re ma peroayvu vy pendu kuua va'erã anho oĩ. Ha'e ajerovia pendu kuua porãmba aguã,

¹⁴ amongue henda py orepy'a re oĩ va'e peikuaa maa rami, nhande-Senhor Jesus oua ára py peẽ

* ^{1:8} Atos 19.23-40

kuery orererovy'a aguã, ore roguerovy'aa rami avi.

Paulo mba'e re pa Corinto py ndooi teria omombe'u porãveague

15 Ha'e rami peẽ kuery orekuaa aguã re ajerovia vy anhembopy'a teĩ peẽ kuerya py ranhe avaẽ vy jajoexa aguã, peteigue ju pejopy aguã penemoingo porãarã,

16 ha'e gui peẽ kuery xepytyvõ ramo aave aguã Macedônia yvy katy, ha'e Macedônia gui ajevy vy peẽ kuerya py ju avaẽ aguã, Judéia yvy katy ju aa rã xepytyvõ aguã.

17 Ha'e rami aguã re xeayvu vy nda'u rombotavypa reia rupi ri aiko raka'e? To'o revegua rami ri ty'y xeayvu? Xee teve "Ha'eve" ha'e vyve "Nda'evei" ha'e avi va'e?

18 Ha'e rami 'rãgue py Nhanderuete ojeroviapy oikoa rami avi ore voi peẽ kuery pe "Ha'eve" ha'e "Nda'evei" ndoro'ei va'e,

19 Nhanderuete Ra'y Cristo Jesus peẽ kuery mbyte rupi ore kuery — xee, Silvano ha'e Timóteo — romombe'u va'ekue rami avi, mba'eta Jesus ma "Ha'eve" ha'e "Nda'evei" he'i avi va'e'ŷ. Hexe ma ha'eve va'e anho oĩ.

20 Mba'eta Cristo re vy Nhanderuete ijayvuague ojeupity aguã ha'eve va'e meme. Ha'e rami ae hexe vy Nhanderuete nhamboete vy "Amém" ja'e avi 'rã.

21 Mba'eta Nhanderuete ae peẽ kuery reve nhanemoĩ atã Cristo re, ha'e ojeupe guarã nhanemoĩ.

22 Nhandere ha'e nunga kuaa ukaarã omoĩ vy Onhe'ẽ ae omoĩ nhanekuraxõ re.

²³ Ha'e gui xerekove rupi ae aipoa'e, Nhan-deruete voi oikuua xeayvu anhetēa: Peẽ kuery romomboriau e'ŷ aguã rima ndajuvei teri apy Corinto py.

²⁴ “Pejeroviaa re orepo'aka va'e” nda'e. Ha'e rami avi peẽ kuery pevy'ave aguã re ronhea'ã. Mba'eta pejeroviaa rupi ae 'rã penembaraeteve.

2

¹ Ha'e rami vy xejeupe ae xeayvu karamboae peẽ kuery romomboriaua rupi aju ve'ŷ aguã re.

² Mba'eta xee romomboriau va'e rire maya'e 'râgue tu oiko xembovy'a ju aguã, peẽ romomboriau va'ekue e'ŷ vy?

³ Ha'e nunga rupi ae ambopara va'ekue, peẽ kuerya py avaẽ vy peẽ xembovy'aarã pendekuai va'e re xeporiau e'ŷ aguã. Mba'eta peẽ kuery ha'e javi re ajerovia mba'emo xembovy'a va'e peẽ voi penembovy'a avi aguã.

⁴ Mba'eta xepy'a py aiko axya ha'e ajexavaia aendu reve ae ambopara va'ekue pêvy, xerexay ete reve guive. Pendeporiau rei aguã e'ŷ guive ambopara, ha'e rã roayvu etea peikuaa aguã.

Ojejavu va'ekue ojeko rerova rã igreja kuery omovaẽ ju aguã re ijayvua

⁵ Ha'e gui penembyte py nhomomboriaua oiko va'ekue ma xee anho e'ŷ xemomboriau, peẽ kuery ha'e javi penemomboriau amongue henda py. Ha'e rami xeayvu ajou vai etea rupi e'ŷ.*

* ^{2:5} Ha'e kuery va'e regua otekoavy va'ekue re ijayvu, xapy'a rei itavy rei va'e 1 Coríntios 5 py omombe'u va'ekue re. Apy ma Paulo ijayvu operdoa ju aguã re (Lucas 17.3,4; Gálatas 6.1,2).

⁶ Ha'eve ma aŷ peẽ kuery regua hetave va'e pembopagaague.

⁷ Ha'e gui aŷ ma ha'eve peperdoa ha'e pembopy'a guaxu ju aguã, mboriau gui okanhy ete e'ŷ aguã.

⁸ Ha'e rami vy pẽvy ajerure ixupe pexa uka ju aguã peayvua.

⁹ Ha'e nunga rupi ae ambopara va'ekue pẽvy, peẽ kuery anhetẽ opa mba'e py pa xenhe'ẽ rendu va'ea aexaxe vy.

¹⁰ Mba'eta mba'emokue re pejoperdoa ri ramo xee voi aperdoa. Anhetẽ peẽ kuery re ama'ẽ vy aperdoa ae ma Cristo renonde,

¹¹ nhandere Satanás ipo'aka e'ŷ aguã, mba'eta jaikuaa porã ae nhanembotavyxea.

Tito ndojoui vy Paulo ndovy'aia re ijayvuague

¹² Ha'e gui Trôade tetã py Cristo regua ayvu porã amombe'u aguã avaẽ jave py peteĩ okẽ ojepe'a xevy Senhor pe amba'eapo aguã.

¹³ Ha'e rami teĩ xe-irmão Tito ndajoui vy xepy'a py ma avy'aa naendui. Ha'e nunga rupi ha'e kuerya gui ajep'e a vy Macedônia katy ju aa.

Apóstolo kuery ombo'eapoa rupi Cristo po'akaa ojekuaa 'rãa re ijayvua

¹⁴ Ha'e rami avi arov'y'a Nhanderuete, mba'eta Cristo re vy opo'akaa rupi riae orereraa, ha'e ore kuery orekuuaia re opa rupi oikuaa uka Cristo regua heakuã porã va'e ramigua.

¹⁵ Mba'eta ore kuery ma Cristo guigua heakuã va'e rami orekuai Nhanderuete pegua, oo jepe va'e ha'e okanhy va'e kuerya rupi.

¹⁶ Okanhy oje'oivy va'e pe ma manoa reakuã rami orekuai, mba'eta ha'e kuery oikuaa omano aguã

regua romombe'ua. Ha'e rã oo jepe va'e kuery pe ma tekove reakuã rami orekuai, mba'eta oikuaa tekove regua romombe'ua. Ha'e ramo mava'e tu ha'eve 'rã ha'e rami aguã?

¹⁷ Mba'eta ore ma Nhanderuete ayvu romombe'ua rupi ndorojokorei, amboae kuery rami e'ÿ. Ha'e rami 'rãgue py Cristo re vy Nhanderuete guigua anhetêa rupi oreayvu roikovy, Nhanderuete renonde rupi ae.

3

Guexeve guarã ojapo pyau pyre inhymague gui iporãvea re ijayvua

¹ Po rami vy ri nda'u oreayvu rojejou porã uka reivea rupi? Amboae kuery rami avi ore voi ri ty'y roipota kuaxia oremombe'uarã pendevy pe rogueraa aguã, ha'e'ÿ vy pende guigua kuaxia romba'eapoa kuaa ukaarã amboae rupi rogueraa aguã?

² Any, mba'eta kuaxia para rami oremombe'uarã ma peẽ kuery ae pendekuai. Ha'e nunga ma orepy'a re ipara oiny ramo ogueroayvu pavẽ, oikuaapa 'rã.

³ Mba'eta peẽ ae pexa uka Cristo guigua kuaxia para pendekuaia, ore kuery romba'eapoa kuaa ukaarã. Ha'e rami avi tinta py e'ÿ ipara, ha'e rã Nhanderuete oikove va'e Nhe'ë py. Itape re'ÿ guive ipara, avakue ro'o re, orekuraxõ re ae.*

⁴ Cristo re vy ha'e rami ae rojerovia Nhanderuete re.

* **3:3** “Itape re ipara va'e” he'ia ma lei Moisés ombopara va'ekue re ijayvu vy, teko yma guare kuaa ukaarã.

⁵ Orejegui ae e'ŷ guive mba'emo rojapo kuaa, oregui e'ŷ mba'emo oiko. Mba'eta rojapo kuaa aguã ma Nhanderuete gui ae ou.

⁶ Ha'e ae oremo'arandu guexeve guarã ipyau va'e ojapo va'ekue roikuua uka aguã. Ha'e va'e ma ipara regua e'ŷ, ha'e rã Nhe'ẽ guigua. Mba'eta ipara regua nhandejuka 'rã. Ha'e rã Nhe'ẽ ma nhanemoingove 'rã.

⁷ Ipara nhandejukaarã ma itape re omboparaa vy omoexakã reve oeja raka'e. Ha'e nunga gui Moisés rova hexakã raxy ramo hova katy Israel kuery noma'ẽ kuaai raka'e, ogue ovy tei.

⁸ Ha'e va'ekue gui nda'u Nhe'ẽ guigua naexakã ratãive 'rã?

⁹ Mba'eta nhanembopagaarã omoexakã reve oeja rire teko porã me'ẽa katuve ma hexakã ratãive 'rã.

¹⁰ Ha'e nunga rupi aŷ hexakã ratãive va'e ou ma rire ymagua omoexakã mbyre rexakãa ndojekuaavei ma.

¹¹ Mba'eta ogue ovy va'e omoexakã reve oeja pyre gui ogue va'erã e'ŷ katuve ma hexakã ratãive.

“Senhor Nhe'ẽ oĩa py jaiko porã 'rã”, he'ia

¹² Ha'e nunga roarõ roikovy vy orepy'a guaxua rupi ete oreayvu.

¹³ Ore ma Moisés ngova omo'ãague rami e'ŷ orekuai. Mba'eta ha'e va'e ma ngova omo'ã raka'e Israel kuery oexa e'ŷ aguã ogue ovy va'e opa rã.*

¹⁴ Ha'e rami tei ha'e kuery 'arandua omopytũmbaa. Mba'eta aŷ peve yma guare guexeve guarã ojapo pyre ogueroayvu rã hova mo'ãa oime teri. Imo'ãa

* **3:13** Êxodo 34.33,35

ma ndoipe'aai teri, mba'eta Cristo re vy mae ma oipe'aa 'rã.

15 Aŷ peve Moisés ombopara va'ekue ogueroayvu rã imo'ãa oime teri ha'e kuery py'a re.*

16 Ha'e rã amongue Senhor pe ojeko me'ẽ ramo oipe'aa 'rã imo'ãa.

17 Ha'e gui "Senhor" he'ia ma Nhe'ẽ, ha'e mamo rã Senhor Nhe'ẽ oĩa py jaiko porã 'rã opa mba'e gui.

18 Mba'eta nhande kuery ha'e javive nhanderova mo'ãa oipe'aa rire Senhor rexakã re nhama'ẽ porã jaikovy epéko re rami. Ha'e ramo nhanembopyau 'rã nhanerexakãve javy aguã rami, Senhor rami ete nhandekuai aguã. Ha'e rami aguã ma Senhor, Nhe'ẽ gui ae ou.

4

Paulo ojapo 'rã va'ekue ojapo porãa re ijayvuague

1 Ha'e nunga rupi Nhanderuete oremboaxy vy ha'e ramigua orerembiaporã ome'ẽ rire norekangyi,

2 neĩ nhemi rupi ndorekuai mba'emo nharoxi va'erãa rupi. Ronhombotavya rupi e'ŷ orekuai, neĩ Nhanderuete ayvu ramigua rive noromombe'ui. Ha'e rami 'rãgue py Nhanderuete renonde orekuai anhetẽ va'e roikuua ucaa rupi, ha'evea rami orekuua oikuua pavẽ aguã.

3 Ha'e gui xapy'a rei ayvu porã romombe'u va'e ndojekuaai teri vy ma okanhy aguã rami ikuai va'e pe anho ndoikuua ukaai.

* **3:15** Romanos 11.7-10

⁴ Mba'eta ha'e kuery ndojeroviai ramo kova'e yvy regua ruete omopytūmba hi'arandua, ha'e kuery pe Cristo rexakāa regua ayvu porā ojekuaa e'ŷ aguā. Ha'e va'e ma Nhanderuete rami ete heko va'e.

⁵ Mba'eta ore ma ore ae e'ŷ rojekuaa uka, ha'e rā Cristo Jesus Senhor oikoa. Ha'e rā ore ma Jesus re vy peẽ kuery rembiguai rami roiko.

⁶ Mba'eta Nhanderuete "Pytūa gui taexakā hendy va'e", he'i va'ekue ae oremoexakā avi orepy'a rupi, Cristo rova re hexakā ojekuaa va'e roexa uka aguā.*

Nhanderuete gui imbaraetea re Paulo ijayvuague

⁷ Ha'e nunga ma iporā ete va'eri hyru yapo gui ojapo pyre ramigua py rive roguereko, pavē oikuua aguā ipo'aka etea Nhanderuete gui ae oua, oregui e'ŷ.*

⁸ Mba'eta ore ma opa mba'e py oremoingo axya teĩ ndorejokoa etei. Ndoroikuuai rei teĩ ndorekueraí.

⁹ Orere opu'āa rei teĩ oeja pyre'ŷ orekuai. Orenupāa teĩ noremombai.

¹⁰ Orerete re Cristo ojukaa ague ramigua roendu riae, orerete re hekove voi ojekuaa avi aguā.

¹¹ Mba'eta Jesus káuxa nhande jaikove va'e jaje-juka uka riae, Jesus rekove ojekuaa avi aguā nhan-derete imarā va'e re.

¹² Ha'e rami vy orere oĩ orejukaa aguā, peẽ kuery re ma tekove oĩ aguā.

* ^{4:6} Gênesis 1.3 * ^{4:7} 1 Coríntios 2.4,5; 2 Coríntios 12.9

13 Ha'e rami teĩ rojeroviaa oĩ avi, ipara oĩa rami: "Xee arovia, ha'e rami vy xeayvu."* Ore voi roguerovia vy oreayvu,

14 mba'eta roikuua Senhor Jesus mboete jevyare ma Jesus re vy ore voi oremboete ju avi 'rã, ha'e peẽ kuery reve nhandererupa 'rã guive.

15 Mba'eta orere oiko va'e ha'e javi ma peẽ kuery penemoingo porãarã oiko. Ha'e rami vy Nhanderuete penemboaxy a heta-etave oikuaa vy oguerovy'a ha'e omboete 'rã okuapy.

Mba'erã pa jaiko axya re ijayvua

16 Ha'e nunga rupi nanhandekuerai 'rã. Ha'e rami 'rãgue py nhanderete ivaipave ov y teĩ nhan-depy'a rupi nhanembopyaua 'rã ko'ẽ nhavõ.

17 Mba'eta xapy'a'i jajexavaia ipoyi e'ŷ va'e ojapo 'rã mba'emo porã opa e'ŷ va'e, opa mba'e gui ovareve va'e jajopy aguã rami.*

18 Ha'e nunga rupi mba'emo jaexa va'e re'ŷ jaikuaa pota, ha'e rã mba'emo jaexa e'ŷ va'e re. Mba'eta jaexa va'e ma opa 'rã, ha'e rã jaexa e'ŷ va'e ma opa va'erã e'ŷ.

5

Nhanderete jaeja vy Senhor oĩa py jaiko 'rãa re ijayvua

1 Mba'eta jaikuaa nhandro yvy regua ivaipa ramo yva re jajopy 'rã nhanderorã Nhanderuete guigua, avakue opo py ojapo va'ekue e'ŷ, opa va'erã e'ŷ.*

* **4:13** Salmo 116.10 * **4:17** Romanos 8.18-25; 1 Pedro 1.3-5

* **5:1** "Nhandro yvy regua" he'ia ma nhanderete re ijayvu vy (4.16; 2 Pedro 1.13,14).

² Ha'e gui kova'e oo py nhaĩ teria ja nhanepoaẽ jaikovy, nhanderorã yva regua nharõ vy ha'e va'e py ju nhaĩ aguã.

³ Mba'eta ha'e va'e py ma nhaĩ vy hete e'ŷ va'e rami ve'ŷ 'rã jaiko.

⁴ Mba'eta anhetẽ kova'e oo py nhaĩ teri vy nhanepoaẽ jaikovy jajexavai vy. Ha'e rami avi hete e'ŷ va'e ndajaikoxei guive, ha'e rã hete pyau va'e, imarã va'e 'rãgue py tekove jareko vy.

⁵ Ha'e rami aguã rami Nhanderuete ae nhanemoingo, ha'e nhandevy Onhe'ẽ guive ome'ẽ ikuaa ukaarã.

⁶ Ha'e nunga rupi nhandepy'a guaxu riae. Nhanderete re jaikoa ja jaikuua Senhor oĩa py ndajaikoi teria,

⁷ mba'eta jajeroviaa re jaiko, mba'emo jaexa va'e re'ŷ.

⁸ Ha'e gui nhandepy'a guaxu vy nhanderete jae-jaxe, Senhor oĩa py ju jaiko aguã.

⁹ Ha'e nunga rupi Senhor oĩa py, e'ŷ vy apy jaiko teĩ nhanhea'ã jaikovy nhambovy'a aguã.

¹⁰ Mba'eta Cristo oikuua potaaty renonde jajexa uka pavẽ 'rã, peteĩ-teĩ jajopy aguã nhanderete re teri jaikoa ja ha'evea rami, e'ŷ vy ha'eve'ŷa rami jaikoague rekovia.

Gueko re apóstolo Paulo ijayvuague

¹¹ Senhor renonde rojererokyjea ore roendu vy amboae kuery pe voi oreayvu ojeko rerova aguã. Nhanderuete orekuaa porã, ha'e ajerovia peẽ voi pene'arandua py orekuaa porã avi aguã.

¹² Ha'e rami peteïgue ju oreayvua rojejou porã ukuaa rupi e'ŷ. Ha'e rami 'rãgue py pendevy roikuaa

uka orekuuaia, amongue orere ijayvu rã peẽ kuery orejou porãa rupi pembovai aguã. Ha'e kuery ma oexa va'e rive oguerovy'ave, opy'a re oĩ va'e'ý.

¹³ Ha'e rami na'inhakã porãvei va'e rami oreayvua ma Nhanderuete peguarã anho. Ha'e rã 'arandua rupi oreayvua ma pendevy guarã.

¹⁴ Mba'eta Cristo orerayvu rire ixupe anho roiko. Mba'eta pavẽ re peteĩ omano rire jaikuua ha'e javive omanoague.

¹⁵ Anhetẽ ete Cristo omano raka'e pavẽ re, jaikove va'e nhandejeupe ae jaiko ve'ý aguã, ha'e rã nhandere omano ha'e onhemboete ju va'ekue pe anho.

¹⁶ Ha'e ramo aý gui ma ndajaikuua potavei avave rei ngo'o re oikoa re. Yma rupi Cristo ngo'o re oikoa re jaikuua pota va'ekue ri aý ma ha'ekue rami ve'ý ma jaikuua.

¹⁷ Mba'eta Cristo re ikuai va'e ma hemimoingo pyau ma. Heko ymague oaxapa ma, ipyau va'e ju oĩ.*

Nhanderuete reve peteĩ rami ju nhandekuai aguã re ijayvua

¹⁸ Ma'ẽ, ha'e nunga ha'e javi Nhanderuete guigua meme. Mba'eta Cristo re vy ngupive nhanemoingo peteĩ rami, ha'e nhanemoĩ guive hexeve peteĩ rami ju nhandekuai aguã regua mombe'uarã,

¹⁹ po rami: Cristo re vy Nhanderuete ma ko yvy regua kuery reko vaiague re oikuua pota 'rãgue py ojapo raka'e hexeve peteĩ rami ikuai aguã. Ha'e nhandevy omombe'u uka guive hexeve peteĩ rami nhandekuai aguã regua ayvu.

* ^{5:17} Romanos 6.4-6; Efésios 4.22-24; Colossenses 3.9,10

20 Ha'e rã ore kuery ma Cristo rery rupi oreayvu va'e, ore oreayvua rupi Nhanderuete voi ijayvu avi. Ha'e rami vy Cristo rery rupi rojerure: Nhanderuete reve peteñ rami penhemoingo uka.*

21 Mba'eta Cristo ojejavvy e'ÿ va'eri nhandere vy hexe omoña raka'e jajejavya, hexe vy nhandere Nhanderuete omoñ aguã ojeguigua teko porã.

6

1 Ha'e rami rire ore hexeve romba'eapo va'e ma peñ kuery pe oreayvu avi Nhanderuete penemboaxya pejopy rive'ÿ aguã re.

2 (Mba'eta aipoe'i: “Ha'evea ára aendu pendeayvua, ha'e rami vy rogueraa jepe aguã ára roepy”, he'i va'ekue.* Ma'ë, aÿ ma ha'evea ára, aÿ ae peo jepe aguã ára.)

3 Ore ma mba'eve py rojoitya rupi e'ÿ orekuai, romba'eapoa ndojou vaiai aguã.

Paulo onhemoingo axy ucaa re ijayvuague

4 Ha'e rami 'rãgue py opa mba'e py roexa uka Nhanderuete rembiguai roikoa: orekuerai e'ÿa py, orekuai axya py, rojexavaia py, rojererekoxpy ucaa py,

5 ronhenupã ucaa py, nhuã py roña py, orere opu'ãmbaa reia py, romba'eapoa py, roke e'ÿa py, rokaru e'ÿ re roikoa py,

6 orerekoxpy ky'a e'ÿa py, mba'emo roikuaa-a py, orevai rive-rive'ÿa py, ha'eve vai'i orekuia py, Nhe'ë Ky'a E'ÿ po'akaa py, oreporayvu merami rive e'ÿa py,

* **5:20** Romanos 5.1,10; Colossenses 1.19,20 * **6:2** Isaías 49.8

⁷ anhetē ete rupi oreayvua py, Nhanderuete po'akaa rupi orekuia py, orepo jovaive py heko porā va'e rembiporu roiporua py;

⁸ oremboetea rupi, ha'e oremboete e'ŷa rupi orererekoa rā; orere ijayvu rei, ha'e ijayvua porā rā; mba'eta nhombotavypa va'e rami orererekoa, anhetē va'e roiko teī;

⁹ oexapy e'ŷ rami orererekoa, oexa riae py roiko teī; omano ta va'e rami orekuaa teī oikove va'e roiko; ombopagapy rami orererekoa teī ndorejukaa;

¹⁰ orepy'a vai va'eri rovy'a riae; oreporiaukue'i va'eri heta rojapo iporiau e'ŷ aguā rami; mba'eve ndoroguererekoi merami teī opa mba'e roguereko.

Paulo oayvua rami ha'e kuery voi oayvu aguā re ijayvuague

¹¹ Peē Corinto pygua kuery pe ronhemombe'u porā, noronhomī orepy'a re oī va'e.

¹² Peē kuery pe ore noronhemoakāte'ŷi, peē kuery ae rima penhemoakāte'ŷ orevy.

¹³ Ore rami avi ke pendekuai. (Xera'y kuery pe rami xeayvu pendevy.) Peē voi ke pendepy'a peipe'a avi orevy.

Ojerovia e'ŷ va'e kuery ikuiaia rami nhandekuai e'ŷ aguā re ijayvua

¹⁴ Canga py peē eme amboae kuery ojerovia e'ŷ va'e reve. Mba'eta mba'exa tu heko porā va'e nhomoirū ta heko vai va'e reve? Mba'exa tu hendy va'e nhomoirū ta pytū reve?

15 Mba'exa tu Cristo oguereko ta Poromboeko vaia reve? Mba'e tu ojerovia va'e oguereko ta ojerovia e'ý va'e reve?*

16 Mba'e 'rã tu Nhanderuete pegua templo oguereko mba'emo ra'angaa reve? Mba'eta nhande ae Nhanderuete oikove va'e pegua templo jaiko, aipoe'iague rami: “Aĩ 'rã, aiko 'rã ha'e kuery mbyte. Aiko 'rã ha'e kuery Ruete, ha'e rã ha'e kuery ma xevyguá 'rã ikuai.”*

17 “Ha'e nunga rupi pejepé'a ha'e kuery mbyte gui, penhemoirûve eme”, he'i Senhor. “Pepokove eme iky'a va'e re. Ha'e ramo xee romovaë 'rã,

18 aiko 'rã Penderu, ha'e rã peẽ ma xera'y ha'e xerajy kuery 'rã pendekuai”, he'i Senhor Ipo'akapa va'e.*

7

1 Ha'e nunga rupi xerembiayvu kuery, ha'e rami nhandereroayvu porã rire jajeky'a'o ukapa 'rã nhanemboeko ky'aarã, nhandro'o ha'e nhanenhe'ẽ mongy'aarã va'ekue ha'e javi gui. Iky'a e'ý ete va'e nhandekuai, Nhanderuete renonde jajererokyjea rupi.

Corinto pygua kuery oayvua rupi Paulo ijayvuague

2 Oremovaë ke penekuraxõ py. Avave rei ndoroguerekoi ha'eve e'ýa rami, noronhomboeko vai ha'e ndorojokorei guive.

* **6:15** 1 Coríntios 10.20-22; 15.33; Tiago 4.4,5
26.11-12, Ezequiel 37.27, Jeremias 32.38
Isaías 52.11, 2 Samuel 7.14

* **6:16** Levítico
* **6:18** Ezequiel 20.41,

³ Ha'e rami avi rojou vaia rupi e'ŷ xeayvu, mba'eta aipoa'e ae ma peẽ kuery orekuraxõ re roguerekoa, joupive nhamano e'ŷ vy jaikove aguã.

⁴ Opa mba'e py anhemombe'u porã pẽvy, opa mba'e py roguerovy'a guive. Ha'e nunga rupi aendu xepy'a guaxuvea ha'e avy'a etea, opa mba'e py rojexavai teĩ.

Tito ovaēague re ijayvuague

⁵ Mba'eta Macedônia yvy re rovaẽ vy peteĩve henda py noroendui karamboae mby'a porã. Ha'e rami 'rāgue py opa mba'e py rojexavai. Amboae kuery opu'ã okuapy orere, ha'e orepy'a py roendu rokyjea.

⁶ Ha'e rami teĩ Tito ovaẽ ramo Nhanderuete ikuerai va'e mbopy'a guaxua va'e vy orembopy'a guaxu ju.

⁷ Ha'e va'e ovaẽ ramo anho e'ŷ, peẽ kuery pembopy'a guaxuague omombe'u rã roendu vy voi orepy'a guaxu. Mba'eta orevy pe omombe'u peẽ kuery xerexaxeа, penhemboaxyha'e xenhe'ẽ rendu pekuapya. Ha'e rami vy xembovy'ave.

⁸ Mba'eta peẽ kuery pe kuaxia ambopara va'ekue pexa vy pendeporiau rei teĩ xee ma nda'evei nho ndaikoi, ymave nda'evei nho aiko va'ekue teĩ (mba'eta aikuaa ha'e va'e kuaxia para xapy'a'i penemomboriaua).

⁹ Ha'e gui aŷ ma avy'a ju, pendeporiaupa reiague re rive'ŷ, ha'e rã pejeko rerova aguã rami pendeporiaague re, mba'eta Nhanderuete gui ae pendu pendeporiaua, ha'e rã oregui ma peteĩve henda py pendeporiau e'ŷ aguã.

10 Mba'eta Nhanderuete gui ma nhandeporiau vy jajeko rerova 'rã jaa jepe aguã. Ha'e rami aguã gui ju avave rei ndojeko rerovavei 'rã. Ha'e rã yvy guigua mboriau reia ma nhamano aguã rami 'rã ojapo.

11 Mba'eta Nhanderuete guigua mboriau ma opa mba'e py penemoingo porã: penhemboeko porã uka, teko vai pejou vai ete, pejererokyje, xerex-axe ete ju, xenhe'ẽ rendu, ha'e penhombopagaxe guive. Opa mba'e py pexa uka pejejavya rupi ve'ŷ pendekuaia ha'e nungakue py.

12 Ha'e nunga rupi pêvy ambopara va'ekue teĩ otekoavy va'ekue re vy e'ŷ ambopara, neĩ omom-boriau va'ekue re vy e'ŷ guive, ha'e rã Nhan-deruete renonde peẽ kuery pexa uka ju aguã orenhe'ẽ rendua.

13 Ha'e nunga rupi ae roendu ju karamboae orepy'a guaxua. Ha'e orepy'a guaxua gui rovy'ave ete, mba'eta roendu avi Tito pembopy'a porã ramo ov'y'aa.

14 Mba'eta ixupe xeayvu va'ekue peẽ kuery roguerovy'aa rami, ha'e gui nda'evei nho ndaikoi. Mba'eta opa mba'e py pendereve oreayvua anhetẽ memea rami avi Tito oendua py roguerovy'aague voi anhetẽ ojeupitypa.

15 Tito voi penderayvua oenduve mba'eta penhe'ẽ renduague ha'e javi re ima'endu'a vy, ha'e gui pe-

jeayvu ha'e peryryipa reve pemovaẽague re guive.
16 Xee avy'a mba'eta opa mba'e py peẽ kuery re ajeroviaa ojeupitypa.

igreja ikuai va'e peráta ome'ëague re ijayvuague

¹ Ha'e rami avi irmão kuery, peẽ kuery pe romombe'u va'ekue Macedônia yvy re igreja kuery ikuai va'e Nhanderuete omboaxy vy marã rami pa omoingoague,

² mba'eta ha'e kuery ma opa marã omoingo axya teĩ oexa uka tema ov'y'a etea, mba'eta iporiaupa va'eri heta ojou irmão kuery pe ome'ë va'erã.*

³ Mba'eta xee aipoa'e: Ha'e kuery oexa uka mba'emo oguereko va'ekue áryve ome'ëxeia.

⁴ Ha'e rami vy orevy pe ju ojerure jepi iky'a e'ë va'e kuery oipytyvõ aguã re, amboae kuery rami avi.

⁵ Ha'e gui ore roexa'ëague rami anho e'ë ikuai, mba'eta Senhor pe ranhe ojeko me'ë okuapy, ha'e rire Nhanderuete oipotaa rami orevy pe ju ikuai.

⁶ Ha'e nunga rupi ae Tito pe rojerure penepytyvõ aguã peráta peme'ë 'rã va'ekue pemono'õmba aguã, ha'e rami aguã omboypy rire.

⁷ Ha'e nunga rupi pejapopa ke, opa mba'e py pendekuai porã etea pexa ukaa rami avi: pejeroviaa py, ayvu py, mba'emo peikuaa-a py, opa mba'e py penekyre'ëa py, ha'e roayvua py guive.

⁸ Pêvy ajapo uka nhea'ëa rupi e'ë guive xeayvu. Ha'e rami avi amboae kuery nhopytyvõxeia pêvy amombe'u vy aexaxe anhetë pa peẽ kuery voi pendoporayvua.

⁹ Mba'eta peikuaa ma Senhor Jesus Cristo nhanemboaxy, mba'eta iporiau e'ë va'eri penderayvu vy iporiau va'e ojeapo raka'e, iporiau va'e oiko ramo peẽ kuery iporiau e'ë va'e peiko aguã.

* **8:2** Atos 11.27-30; Romanos 15.25-27; 1 Coríntios 16.1-4

10 Amombe'u porāve ta aikuua va'e: Peẽ kuery ma ma'etÿa oaxa va'e py peẽ ranhe pemboypy va'ekue mba'emo pemono'õ aguã, mba'eta peẽ ranhe pendepy'a re ha'e rami aguã pemoõ va'ekue. Ha'e rami vy po rami 'rã ha'eve:

11 Aÿ pejapopa ke pemboypy va'ekue. Peme'ëxea peikuua ukaague rami pemono'õmba ke peme'ë va'erã, pejoua'i rami.

12 Mba'eta nhame'ëxea oĩ ramo jajoua rami nhame'ë rã ojou porã pavẽ 'rã, ruxã'i anho jajou vy nanhame'ëive teñ.

13 Mba'eta "Amboae kuery nome'ëive, ha'e rã peẽ peme'ëve aguã" nda'ei. Ha'e rami 'rãgue py aipota joo rami meme perekoi mba'emo.

14 Ha'e rami vy perekopa va'e gui pemboja'o ramo ha'e kuery pe ndoatavei 'rã, araka'eve rã ha'e kuery ju oguerekopa va'e gui omboja'o rã pendevy pe ju ndoatavei aguã. Ha'e rami vy joo rami meme 'rã perekoi,

15 ipara oña rami: "Omono'õ reta va'ekue pe naembreyai. Ha'e rã mbovy'i omono'õ va'ekue pe ma ndoatai."*

Tito pe ojapo uka pyau jevyague re ijayvua

16 Ha'e gui arovya Nhanderuete mba'eta Tito py'a re omoõ xee rami penepytyvõxe.

17 Ha'e ramo ojapyxaka karamboae rojerurea re. Ha'e rami vy ikyre'ÿve ete vy ha'e ae penepytyvõxe rupi oguata peẽ kuerya katy.

18 Hupive romondouka avi irmão mboae. Ha'e va'e ma ayvu porã omombe'ua rupi oiko va'e, opa rupi igreja kuerya oikuaa.

* **8:15** Êxodo 16.18

19 Ha'e rami anho e'ŷ, igreja kuery oiporavo va'ekue oreirũrã, peráta mono'õa rupi oreptytyvõ aguã. Ha'e nunga rojapo Senhor omboetea aguã, ha'e ronhopytyvõxe etea roexa uka aguã.

20 Mba'eta ronhea'ã avave rei orere ijayvu rei e'ŷ aguã peráta ome'ëa reta pyre rogueraa rã.

21 Mba'eta ronhea'ã ha'evea rami orekuai aguã Senhor renonde, ha'e avakue oexaa py guive.

22 Ha'e va'e irmão kuery reve romondouka avi nhande-irmão mboae. Ha'e va'e ma opa mba'e py nhopytyvõxea roexa jepi va'e, mbovykue rei e'ŷ. Ha'e gui aŷ ma peẽ kuery re ojeroviaa rupi vy oexa ukave ju nhopytyvõvexea.

23 Ha'e gui xeirũ Tito ma peẽ kuerya rupi xepytyvõ va'ety. Ha'e gui irmão kuery mboae ma igreja kuery remimondouka meme, ha'e Cristo mboetea guive.

24 Ha'e ramo igreja kuery pavẽ renonde peẽ voi ke pexa uka pendoporayvua, ha'e va'e avakue oendua py ore roguerovy'a rire.

9

*Ha'e kuery ome'ëmba voi aguã re Paulo
ijayvuague*

1 Ha'e gui iky'a e'ŷ va'e kuery pe mba'emo pemboja'o aguã re ambopara ve'ŷ teĩ ha'eve,

2 mba'eta aikuua porã peipytyvõxe. Ha'e nunga py roguerovy'a Macedônia pygua kuery ikuiaia rupi. Mba'eta ha'e kuery pe aipoa'e penderekó re: “Acaia pygua kuery ma ma'etŷa oaxa va'e guive mba'emo omboja'o aguã rami ikuai”, ha'e va'ekue.

Ha'e rami vy peẽ ranhe peme'ẽxe rire heta ju ma ikuai ome'ẽxe avi va'e.

³ Ha'e rami avi pẽa py ambou irmão kuery, peẽ kuery roguerovy'aa oaxa rive'ŷ aguã, ha'e rami 'rāgue py pemono'õmba aguã, xee aipoa'eague rami.

⁴ Ha'e rami vy Macedônia pygua kuery xerupive ou va'e oexa e'ŷ aguã ndapejapo porãi ra'ea, roximba e'ŷ aguã. (Ha'e rami avi “Peẽ peximba 'rã” nda'ei,) mba'eta peẽ kuery re ajerovia ae ha'e nunga py.

⁵ Ha'e rami avi ajou porã xegui irmão kuery ranhe peẽ kuerya py ambou aguã, oguereko katu ma voi aguã mba'emo peme'ẽ aguã va'ekue. Ha'e rami vy pemono'õmba 'rã penhopytyvõxea rupi ete, penerakâte'ŷ reia rupi e'ŷ.

Mba'emo moaña ha'e imono'õa re ombojojaague

⁶ Aipoa'e: Mbovy'i ri amongue omoaĩ rire mbovy'i avi 'rã omono'õ. Ha'e rã omoaĩ reta va'ekue ma omono'õ reta avi 'rã.

⁷ Peteĩ-teĩ tapeme'ẽ pendepy'a re pemoïague rami, penerakâte'ŷa rupi e'ŷ, neĩ ame'ẽ uka nhea'ã ramo e'ŷ guive, mba'eta Nhanderuete oayvu ov'y'a reve ome'ẽ va'e.

⁸ Ha'e ramo Nhanderuete penemboaxy vy opa mba'e 'rã ojou uka pẽvy. Ha'e rami vy opa mba'e pejou riae 'rã, opa mba'e py penhopytyvõ aguã,

⁹ ipara oĩa rami: “Mba'emo omboja'o vy ipori-aukue'i pe ome'ẽ ramo heko porãa ojekuaa riae 'rã”, he'iague rami.*

¹⁰ Mba'eta Nhanderuete ae ome'ẽ mba'emo ra'yigue inhotŷarã pe, mbojape guive ome'ẽ ho'u va'erã pe. Ha'e pendevy pe voi ome'ẽ porãmba

* **9:9** Salmo 112.9

'rā pemoaĩ va'erā, omboetave avi 'rā pendereko porāa.

¹¹ Opa mba'e ome'ẽmba 'rā pendevy, opa mba'e py joupe pemboja'o aguã. Ha'e gui ha'e joupe rogueraa ramo heta 'rā oguerovy'a Nhanderuete.

¹² Mba'eta ha'e rami penhopytyvõ ramo iky'a e'ŷ va'e kuery oguerekopa 'rā. Ha'e rami anho e'ŷ, heta oguerovy'a 'rā Nhanderuete guive.

¹³ Mba'eta Nhanderuete omboete 'rā okuapy, peipyptyvõa py Cristo regua ayvu porã peroviaa rupi penhe'ẽ rendua pexa uka ramo, mba'eta peme'ẽxea py ha'e kuery pe pemboja'o, pavẽ rei pe guive.

¹⁴ Ha'e ramo ha'e kuery ma pendererovy'aa rupi ojerure 'rā pendere, opa mba'e py Nhanderuete penemboaxyaa oikuua vy.

¹⁵ Nhandevy Nhanderuete ome'ẽ opa mba'e gui iporãve va'e. Ha'e ramo jarovy'a.

10

Apóstolo po'akaa rupi Paulo ijayvuague

¹ Cristo ivai rei e'ŷ ha'e porayvu va'e rery rupi xee Paulo ae pêvy ajerure. Xee ma anhetẽ peẽ kuerya py aiko jave xe'yvy'i va'eri pendekuaia rupi e'ŷ aiko jave "Ijayvu ete va'e" 'ea xevy.

² Tá, xee ajerure pêvy peẽ kuerya py avaẽ ju jave ijayvu ete va'e rami e'ŷ xeapo aguã, mba'eta anhetẽ xeayvu ete 'rā amongue to'o re roikoa rami ijayvu va'e ikuai rã.

³ Mba'eta orero'o re roiko teĩ to'o oikuua rami e'ŷ guive ropu'ã roikovy orerovaigua kuery re.

⁴ Mba'eta ore ronhea'ãa rupi tembiporu roiporu va'e ma to'o guigua e'ÿ, ha'e rã Nhanderuete guigua ipo'aka va'e, oo imbaraete ete va'e mbovaipaarã.* Ha'e rami vy rombovaipa 'rã nhombotavypa reia rupi ayvua,

⁵ ha'e opa marãgua onhemboyvatevexea guive, Nhanderuete oikuaaxe va'e rovai opu'ã va'e. Ha'e rami vy roity avakue 'arandu ha'e javi, ha'e kuery voi Cristo onhe'ẽ rendu aguã rami.

⁶ Ha'e gui opa mba'e py penhe'ẽ rendu ma ri ramo rombopaga 'rã inhe'ẽ rendu e'ÿ va'e ha'e javi.

⁷ Peikuuaa pota ke mba'emo ojekuaa porã va'e re. Amongue ojejou porãa rupi ojeupe “Cristo pegua” he'i vy peteïgue ju toikuaa pota ojee. Mba'eta Cristo pegua ha'e kuery oikoa rami avi ore voi Cristo pegua roiko.

⁸ Orepo'akaa re peteïgue ju xeayvu teĩ naxĩ, mba'eta peẽ kuery romombaraeeteve aguã Senhor orembopo'aka, penembaraetea rombovaipa aguã e'ÿ.

⁹ Ha'e rami xeayvu, kuaxia ambopara vy romongyjexea rami pexa'ã e'ÿ aguã.

¹⁰ Mba'eta amongue ndaxejou porãi vy aipoe'i: “Paulo kuaxia ombopara va'ekue ma ipoyi, ha'e ipo'akaa kuaa ukaa guive, va'eri nhandea py oĩ vy ikangy, ha'e ijayvu ndovarei”, he'i.

¹¹ Ha'e rami ijayvu va'e toikuaa pota pova'e nunga re: Ha'e kuerya py e'ÿ roĩ jave kuaxia para romboparaa rami ae ju 'rã oreayvu ha'e kuerya py rovaẽ vy.

* **10:4** Efésios 6.10-18; 1 Tessalonicenses 5.8

12 Mba'eta ore ma noronhembovatexei va'ekue, ojejou porã rei va'e kuery rami e'ÿ. Ha'e kuery ma ojee ae rive ov'y'a, ha'e ojegui ae mba'emo ombojoja vy oexa uka o'arandu e'ÿa.

*Mamo pa Paulo omba'eapo aguã oikuua
ukaague re ijayvua*

13 Ha'e rã ore ma orejee ae ndoreayvui 'rã ha'evea ramigua áryve, Nhanderuete orerembia-porã ome'ë va'ekue re anho oreayvu. Mba'eta peẽ kuerya rupi voi romba'eapo aguã ome'ë.

14 Mba'eta peẽ kuerya rupi noremomba'eapoi va'e rire pendekuaia re oreayvu aguã nda'evei 'rãgue. Ha'e rami avi Cristo regua ayvu porã romombe'u vy peẽ kuerya rupi romba'eapo ae ma.

15 Ha'e rami avi ha'evea ramigua áryve e'ÿ 'rã oreayvu, amboae kuery ombo'eapoa re oreayvu e'ÿ aguã. Ha'e peẽ kuery re rojerovia, pejeroviaa oïve ramo peẽ kuerya rupi romba'eapove aguã, orerembiaporã ome'ë mbyre rami vy,

16 ha'e pendekuaia rovai rupi voi ayvu porã romombe'u aguã, mba'eta ore ndoreayvui 'rã amboae kuery ombo'eapoague rupi ore ju romba'eapoa roguerovy'aa rupi.*

17 Ha'e rami 'rãgue py "Mba'emo oguerovy'a va'e ma Senhor ae toguerovy'a" he'ia rami orekuai.*

18 Mba'eta amongue ha'e ae rive ojererovy'a va'e'ÿ 'rã ojou porã mbyrã oiko, ha'e rã Senhor oguerovy'a va'e anho.

* **10:16** Romanos 15.18-21

* **10:17** Jeremias 9.24

11

Paulo gueko re ijayvuve jevyague

¹ Inhakā porā e'ŷ va'e rami xeayvuve ju ta ramo aipota xereropo'akave. Ha'e rami vy xereropo'akave'i ju ke.

² Mba'eta peẽ kuery re xee nda'evei etea ma Nhanderuete guigua ae. Mba'eta omerā peteĩ'i va'e pe kunhataĩ ete'i ojexa uka va'e rami avi xee ma roguereko katu peteĩ pe roexa uka aguã. Ha'e va'e ma Cristo.

³ Ha'e rami teĩ xee akyje, mboi ijapua rupi Eva ombotavyague rami avi pene'arandua voiombovaipa avi gui, peteĩ rami anho pendepy'aa ha'e Cristo pe pendeko ky'a e'ŷa rupi pendekuaia gui pejep'e'gui.

⁴ Mba'eta anhetẽ pẽa py amongue ovaẽ vy Jesus regua ore romombe'u va'ekue ramigua e'ŷ 'rã omombe'u, ha'e rami e'ŷ vy Nhe'ẽ e'ŷ vy ayvu porā pejopy va'ekue ramigua e'ŷ 'rã omombe'u. Ha'e ramo ha'e va'e regua pe teĩ penhembo'e uka 'rã, pevy'a reve.

⁵ Ha'e kuery ojeupe ae “Apóstolo” he'ia va'e gui xee ma neĩ peteĩ henda py naxe'yvy'iive.

⁶ Ayvu py xe'yvy'i teĩ mba'emo aikuaa-a py any. Ha'e nunga ha'e javi roikuua uka ae ma pẽvy, opa mba'e py.

Joupe nonhemongaru ukaiague re Paulo ijayvuague

⁷ Tyrã pa peẽ kuery romboyvateve vy xee ae anhemo'yvy'iive vy ajejavvy va'ekue ri ty'y? Mba'eta peẽ kuerya rupi aiko jave hepy e'ŷ re amombe'u va'ekue Nhanderuete guigua ayvu porā.

8 Mba'eta igreja kuery mboae gui mba'emo aipe'a heruvy peẽ kuery roipytyvõ rive aguã, ha'e amba'eapoague repy ajopy guive.

9 Peẽ kuerya py aiko jave mba'emo py xeporíau teĩ peẽ kuery peteĩve pe nanhemongaru ukai. Mba'eta Macedônia gui irmão kuery ovaẽ vy ome'ẽmba aikotevẽ va'ekue. Opa mba'e py anhea'ã va'ekue peẽ kuery pe anhemongaru uka e'ŷ aguã, ha'e anhea'ã riaeve 'rã guive ha'e rami.*

10 Cristo regua ayvu anhetẽ ete va'e xere oĩ va'e rupi aipoa'e: Xegui ndoipe'aai 'rã apy Acaia yvy re ha'e rami aiko vy avy'aa.

11 Mba'e re nda'u nanhemongaru ukai va'ekue pendevy? Peẽ kuery roayvu e'ŷ vy teve ha'e rami aiko? Nhanderuete ma oikuua roayvua.

12 Ha'e rami 'rãgue py “Paulo kuery rami orekuai” he'i rive va'e kuery amokyrirĩ aguã nanhemongaru ukai va'ekue pendevy, ha'e kuery ojejou porã ve'ŷ aguã. Ha'ekue rami aiko riaeve 'rã guive,

13 mba'eta ha'e kuery ma apóstolo ramigua rive, anhetẽ rupi e'ŷ omба'eapo, Cristo pegua apóstolo ramigua rive onhemoingo va'e.

14 Ha'e ramigua jaexa teĩ nanhanhemondyi, mba'eta Satanás ae voi anjo hexakãmba va'e rami onhemoingo.

15 Ha'e nunga rupi hembiguai kuery voi heko porã va'e merami rive onhemoingo rã jaexa vy nanhemondyi 'rã. Ha'e gui opaa py ha'e kuery ha'evea rami 'rã opaga ojapo vaiague re.

Ayvu porã káuxa ojexavaia re Paulo ijayvuague

* **11:9** 1 Coríntios 9.1-27

16 Teīgue ju xeayvu: Avave rei xevy pe “Inhakā porā e'ŷ va'e” ta'ea eme. Ha'e rami teī ha'e rami xekuaa va'e ikuai vy taxereropo'akave'iju, inhakā porā e'ŷ va'e rami xejee xeayvuve rā.

17 Mba'eta xeayvu ta Senhor gui e'ŷ ijayvu va'e rami, 'arandu rupi e'ŷ, ojejou porā rei va'e rami rive.

18 Heta ikuai to'o re vy ojererovy'aa rupi rive ijayvu va'e. Ha'e gui xee voi xeayvu ta ranhe ajererovy'aa rupi.

19 Mba'eta peē kuery pendejeupe “Hi'arandu va'e” peje teī pevy'a reve penhembo'e uka hi'arandu e'ŷ va'e pe.

20 Ha'e kuery pe pejejokuai uka escravo rami, penhemomba uka, pejekore ukapa, mba'eta pendegui onhemboyvateve vy penderova petepa.

21 Xee axī reve xema'endu'a ha'e kuery rami orekuai aguā ndorepy'a guaxuiague re. Ha'e rami avi amongue ipy'a guaxua rupi ijayvu ramo xee voi xepy'a guaxu'rā. Inhakā porā e'ŷ va'e rami teri xeayvu.

22 Ha'e kuery hebreu regua teve? Xee voi hebreu aiko. Ha'e kuery Israel regua teve? Xee voi. Ha'e kuery Abraão ramymino teve ikuai? Xee voi.

23 Cristo rembiguai teve ikuai? (Inhakā porā e'ŷ va'e rami teri xeayvu.) Xee katuve ma ha'e aiko. Mba'eta pavē gui amba'eapove, nhuā py hetakueve aĩ, mbovykue rei e'ŷ anhenupā uka, mbovykue rei e'ŷ amano aguā rupi aiko va'ekue.

24 Peteī nhiruīgue ma judeu kuery xenupā trinta e nove-kue,

25 mboapykue xenupā yvyra rovi py, peteīgue ita py xeapipaa, mboapykue kanoā aĩa va'e oike, peteī

pytū ha'e peteī ára ye'ē mbyte py aī va'ekue.

²⁶ Aguataa rupi aiko vy mbovykue rei e'ŷ ajexavai. Yy oxyry atā va'e rupi aaxa, jojuka rive-rive va'e ikuiaia rupi, xeretarā kuery ha'e amboae regua xejukaxe ramo, tetā ha'e tekao e'ŷa rupi aikoa py, ye'ē rupi aa vy, ha'e irmāo ramigua rive xejukaxe ramo.

²⁷ Amba'eapoa py aiko vy xekane'ō va'ekue, mbovykue rei e'ŷ ake e'ŷ re aiko. Xenhembyayi ha'e xey'uvei va'ekue. Mbovykue rei e'ŷ akaru e'ŷ re aiko va'ekue, ha'e xeao e'ŷ vy yro'y aendu guive.

²⁸ Ha'e nunga xerete re oiko va'e ramigua anho e'ŷ aendu, ko'ě nhavō xere oĩ ipoyive va'e, igreja kuery ha'e javi re nda'evei aikoa.

²⁹ Ha'e kuery va'e regua ikangy rā xee voi xekangya aendu. Ho'a ramo xee voi xepy'a vai 'rā.

³⁰ Ha'e rami avi mba'emo arov'yaa rupi xeayvu vy xeayvu ta avi xekangya rupi aikoa re.

³¹ Nhanderuete, Senhor Jesus Ru va'e raka'e rā peve ima'endu'a porāmby oiko va'e ma oikuaa ndaxeapuia.

³² Damasco tetā py aiko jave tetā re opena va'erā huvixave Aretas omoĩ va'ekue omboaty jopya kuery xejopy aguā.

³³ Ha'e rami teī tetā kora re janela oĩ va'e gui xemboguejya yvy katy peteī ajaka tuvixa va'e py. Ha'e rami vy aa jepe karamboae ha'e kuery po gui.*

12

* **11:33** Atos 9.23-25

*Senhor mba'emo oexa uka ha'e oikuua ukaague
re ijayvuague*

¹ Ajererovy'aa rupi xeayvuve aguã nda'evei teĩ amombe'u ta Senhor mba'emo oexa ha'e oikuua ukaague.

² Peteĩ ava aikuua Cristo pegua. Ha'e va'e ma catorze ma'etŷ ma ojapo yva mboapya peve oupiague. Hete reve pa tyrã hete reve'ŷ oupia xee ndaikuuai, Nhanderuete ma oikuua.*

³ Ha'e gui ha'e va'e ava hete reve pa tyrã hete reve'ŷa ndaikuuai, Nhanderuete ma oikuua teĩ xee aikuua

⁴ yvy marã e'ŷ re oupia. Ha'e ramo ayvu oendu avave rei omombe'ua aguã nda'evei va'e.

⁵ Ha'e ramigua oikoague re xee xeayvu 'rã, ha'e rã xereko re ae ndaxeayvui 'rã, xekangya re e'ŷ vy.

⁶ Ha'e rami ajererovy'aa rupi xeayvu va'e rire inhakã porã e'ŷ va'e ndaikoi 'rãgue, mba'eta anhetẽ va'e meme. Ha'e rami teĩ ha'e rami ndaxeayvuxei, avave rei xejou porã rei e'ŷ aguã. Ha'e rã xere mba'emo oĩ rã oexa, e'ŷ vy xegui ayvu oendu va'ekue anho ha'eve.

Ho'o re juu oĩ va'e re Paulo ijayvuague

⁷ Ha'e ramigua iporã ete va'e xevy oikuua ukaague re ajejou porã rei e'ŷ aguã, peteĩ juu omoĩa xero'o re. Ha'e va'e ma Satanás ombou va'ekue xererekox aguã, anhemboyvate rei e'ŷ aguã.

⁸ Ha'e nunga rupi mboapykue Senhor pe ajerure xegui oipe'a aguã re.

* **12:2** Apy “Peteĩ ava” he'ia ma ojee ae ijayvu vy (versículo 7).

9 Ha'e rami teĩ aipoe'i xevy: “Xee romboaxya ha'eve ma ndevy, mba'eta ikangy va'e re xepo'akaa ojekuaa porâve 'rã”, he'i va'ekue. Ha'e nunga rupi avy'a reve 'rã xeayvu xekangya re, xere Cristo po'akaa oĩ aguã.*

10 Ha'e rami vy arovya 'rã xekangya, xere ayvua reia, ajexavaia, xere opu'ãa reia, ha'e nda'evei aikoa Cristo káuxa aendu va'e. Mba'eta xekangya py xembaraeteve 'rã.

Apóstolo oikoa kuaa ukaa re Paulo ijayvuague

11 Inhakã porã e'ŷ va'e rami xeayvu va'ekue, ha'e rami aguã rami peẽ ae xemoingo ramo. Peẽ ae pendeayvu 'rãgue xererovy'aa rupi, mba'eta xee ma mba'eve py ojeupe “Apóstolo” he'i rive va'e kuery gui naxe'yvy'ive, mba'e'ŷ aiko va'eri.

12 Mba'eta peẽ kuery mbyte rupi aexa uka ae ma apóstolo aikoa kuaa ukaarã, opa mba'e aropo'akaa py, ha'e gui hexa pyrã, nhomondyipaarã ha'e po'akaa kuaa ukaarã ajapoa py guive.

13 Mba'e nunga py tu igreja kuery mboae gui peẽ kuery pe ajapo vaive, xee anho pêvy nanheptyvõ ukaia py e'ŷ vy? Xeperdoa ke ha'e nunga py ri ajapo vai rã.

Oipouxea rupi Paulo ijayvuague

14 Mboapykuea ma peẽ kuerya py aa aguã rami aiko, ha'e teĩgue ju nanheptyvõ ukai 'rã guive pêvy. Mba'eta xee ndaipotai mba'emo perekva'e, peẽ kuery ae roipota. Mba'eta ta'y kuery minha mba'eve nomoĩ porãi 'rã nguu kuery peguarã, ha'e

* **12:9** 1 Coríntios 1.26-29

rā tuu kuery ma gua'y kuery peguarā omoī porā 'rā mba'emo.

15 Ha'e nunga rupi xee avy'a reve mba'emo ame'ẽ, ha'e penenhe'ẽ re vy xee ae anhemomba uka 'rā guive. Pavē gui xee roayvuve rā peē kuery ndaxerayvuive teve?

16 Mba'eve py pěvy nanhepytyvō ukai ramo xapy'a rei peē kuery va'e regua "Paulo ijapu vy nhan-dekorea rupi oiko" he'i 'rā.

17 Ha'e rami avi pēa py amongue ambou va'ekue pe teve rokore uka?

18 Mba'eta Tito ou aguā re ajerure, ha'e hexeve ambou avi karamboae irmão mboae. Tito teve pendekore raka'e? Hexeve peteī nhe'ẽ rupi ae e'ỹ ri ty'y roiko? Peteī tape rupi e'ỹ ri ty'y roo?

Ha'e kuery oipou aguā okyjea rupi Paulo ijayvuague

19 Are ma guive rā peē kuery pexa'ã teī ore rojou porā ukaxe vy rive oreayvua rami. Ha'e rami 'rāgue py xerembiayvu kuery, Cristo re vy Nhan-deruete renonde romombaraeve aguā oreayvu ha'e nunga ha'e javi re.*

20 Ha'e rami teī akyje, peē kuerya py avaẽ vy aipotaa rami e'ỹ pendekuai rā roexa gui, ha'e peē voi pexa'āgue rami e'ỹ xerexa gui. Akyje peē kuery mbyte aexa gui joguero'a rei va'e, joe ija'e'ỹ, ivai rei, ha'e ranhexe va'e, ijayvu vaikue, ijayvuxe, onhemboyvate ha'e nhombopoxypa rei va'e.

21 Akyje peteīgue ju avaẽ ramo peē kuery mbyte Xeruete xemo'yvyi rivyvyi gui, ha'e yma rupi pejavyague gui ndapejeko rerovai rā xee ajae'o

* **12:19** 2 Coríntios 3.1-3

rivyvyi gui, heko ky'a rei va'e, itavy rei ha'e opa marā ikuai va'e aexa vy.

13

Oikuaa pota ha'e ijayvu ete aguā re Paulo ijayvuague

¹ Kova'e re mboapykuea ma 'rā avaẽ peẽ kuerya py. "Mokoī e'ŷ vy mboapy mba'emo omombe'u rā jaikuua porāve 'rā", 'ea ague rami.*

² Mba'eta mokoīgue pēa py aĩ jave aipoa'eague rami ae ju 'rā xeayvu. Aŷ peẽ kuerya py naĩ vy aipoa'e ymave rupi ojejavy va'ekue pe, ha'e amboae kuery ha'e javive pe guive: Peteīgue ju avaẽ vy xee noromboaxyvei ma 'rā.

³ Mba'eta peikuaaxe anhetē pa Cristo gui ae xeayvua. Ha'e va'e rima na'ikangyi 'rā peẽ kuery mbyte, ha'e rā pendevy pe oexa uka 'rā opo'akaa.

⁴ Mba'eta anhetē ikangy va'e rami kuruxu re onhemoī uka va'ekue ri oikove ju raka'e Nhanderuete po'akaa rupi. Ha'e rami ae hexe vy ore voi orekangy va'eri peẽ kuery mbyte Nhanderuete po'akaa rupi avi 'rā orekuai hexeve.

⁵ Peikuaa pota ke pendejee ae, pexa aguā anhetē pa pejeroviaa oĩa. Penheā'anga ke pendejee ae. Ndapeikuaai ri ty'y Jesus Cristo pendere oĩa? Ha'e rami e'ŷ ri ramo ojou vaipy peiko.*

⁶ Ha'e rami teĩ xee ajerovia peikuaa aguā ore kuery ojou vaipy e'ŷ roikoa.

⁷ Nhanderuete pe rojerure mba'eve py pejejavy e'ŷ aguā, pavẽ orejou porā aguā e'ŷ guive. Roipota

* **13:1** Deuteronomio 19.5 * **13:5** 1 Coríntios 11.31

va'e ma teko porã rupi peẽ pendekuai, ojou vaipy ore roikoa rami amongue oikuaa teĩ.

⁸ Mba'eta peteĩve henda py ndorepo'akai 'rã anhetẽ va'e rojoko aguã, ha'e rã anhetẽ va'e ojekuaa porãve aguã anho.

⁹ Ha'e rami vy rovy'a 'rã peẽ penembaraete ramo, ore orekangy teĩ. Ha'e rami vy rojerure peẽ kuery opa mba'e py pendekuai porã aguã.

¹⁰ Ha'e nunga rupi pẽa py e'ŷ teri aiko vy ambopara ha'e rami, peẽ kuerya py aiko jave Senhor xembopo'akaague rami vy rombopaga e'ŷ aguã, mba'eta anhomomba aguã e'ŷ xembopo'aka, ha'e rã anhomombaraeteve aguã.

Oxaruraa rupi ijayvuague

¹¹ Aŷ ma irmão kuery, pevy'a ke. Opa mba'e py pendekuai porã pota, joo meme penhombopy'a guaxu, peteĩ rami peikuaa, ha'e peteĩ rami pendekuai guive. Ha'e ramo Nhanderuete mborayvu me'ëa ha'e peteĩ rami nhanemoingoa va'e oiko 'rã pendereve.

¹² Pexarura joupe-upé iky'a e'ŷ va'e joavyua rami. Iky'a e'ŷ va'e kuery ha'e javi oxarura uka pãvy.

Ogueroayvu porãague

¹³ Tove peẽ kuery ha'e javive tapendu Senhor Jesus Cristo nhanemboaxyá, Nhanderuete nhanderayvua ha'e Nhe'ë Ky'a E'ŷ peteĩ rami nhanemoingoa.

Nhanderuete ayvu iky'a e'ŷ va'e New Testament in Guarani, Mbyá

copyright © 2004 Wycliffe Bible Translators, Inc.

Language: Mbyá Guarani (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guarani, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
3309fa3b-7590-5ae9-b829-5df4ddfbf957